

Die Altstadt als Kneipeverrdel?

Deletzt sinn merr omm Stommdisch vom Hinkelsche uffs Gickelsche kumme. Uff oomol sächt de Schorsch: Habbderr's gelese? – doo gibt's so Bürger in de Stadt, die wolle, dass die Altstadt von Flerschem e Kneipeverrdel werred. Nur so kennt merr die Stadt zwische Eiseboh unn Moo attraktiv halle. Wie denkden ihr doodriwwer?

De Karl gibt Antwort: Also die selwe Bürger warn's joo aach gewese, die oogerecht hawwe, unne omm Domm enn Woistond oizerichte. Ich war noch nitt dort, awwer wie merr heert werred der gut oogenumme. Warum also solle die Bürger mett dem Vorschlaach mettem Kneipeverrdel nit aach Erfolg hawwe? Schließlich isses doch so, dass Flerschem nit nor drauße aus dem Oikaafszenrum bestehe derrf, naa, aach die Altstadt muss uffgewert werrn. Unn doo wärs halt gut, wenn die Leit aus Fronkfort odder Wissbade, die immer was Gutes ze esse unn ze drinke suche, uff ihm „Fahrplan durch die Region“ aach dess Wort „Flörsheim“ druffstehe hädde.

Ich saach: Dess iss dess oone. Dess onnern iss, dass dess beste Stick von unserm Flecke nit nor aus Kneipe bestehe derrf. Wenn die Auswärdische widder fort sinn, bleiwe die Leit iwwerich die hier wohne unn lewe. Die gehn aach emol in die Werrtschaft, awwer hauptsächlich mache sich vill von dene Gedonke, wo se oikaafe kenne. Weil se koo Audo hawwe unn kooner, der se in die Kolonnade fährt.

De Schorsch hott gegrinst: Doo missde die Bürger sich aach doodeferr stark mache, dass die Kneipe außer Worscht unn Flaasch aach noch Spüli, Toilettebabier, Salz unn Zucker verkaafe derrfe.

De Karl hottem Schorsch uff die Schulter gekloppt. Mensch, dess iss gut: Kneipe als Tante-Emma-Läde, ferr de kloone Oikaaf uff die Schnelle. Dess kennt oomol soi im Joffche ferr die Gänskippler unn im Schoosche ferr die von de Riedstrooß unn von de Ederschemer Strooß. Dess wär doch was.

Ich saach: Unn weil moncher Kunde koo Trepp hochgieh kann, missde die e Schiebefenstersche nooch drauße mache, wissder, wies doomols im Scharfe Eck war, wennde hiegonge bist unn ferr de Vadder enn Kruch Bier kaaft host. Stellt eich vor, dess Fenster gieht uff unns Joffche guckt eraus, mett de Edeka-Kapp uffem Kopp unn frächt: Was derfs denn soi?

De Schorsch hott gelacht. Ihr Männer, heert uff. So was werred nie genehmischt, weil die Leit solle in de Kolonnade oikaafe, egal wie se dort hiekumme.

Ich saach: Also bleibts doch beim Kneipeverrdel. Ich moon halt nor, uff Dauer iss dess ferr Auswärdische zu wenich, doo kennese joo gleich noch Wicker fahrn. Merr misst ...

De Schorsch unn de Karl hawwe gleichzeitisch gefroocht: Was misst merr?

Ich druff: Merr misst aus Flerschem e Festspillstadt mache, mett emm historische Volksstick uffem Platz hinner de Galluskerch, mett dreihunnert Stühl uffem Platz unn emm Reechedach driwwer, unn uff de Bihn Mord unn Dotschlaach, Schmuserei unn Eifersucht, scheene Mädcher unn knackische Kerle, ahle Weiwer unn knodderische Alte, unn omm End misste alle Leit flenne, so schee missts soi. Dess det mehr Reklame ferr Flerschem mache als alle Kneipe zesomme. Moonder nitt aach?

De Schorsch hott gesaat: Honnes, die Idee missde sich nor e paar von unserne Politiker ze eiche mache, unn dorsch die Festspillerei det sich bald weit im ganze Lond erumspreche wie schees in Flerschem iss. Awwer wer soll dess Stick schreiwe?

Ich saach: Ei ich. Wer sunnst!

Eiern Honnes.